



Terenga 6: Hōtaka 48 - Te whakataurite

He Mihi

Kei ngā peruperu kōkako, kei ngā kumikumi kōkō, whakapiri mai anō ki raro i te tāwharau o Ako. He wāhi tēnei ka muia e te hunga e hōkaka ana ki te kai a te rangatira. Pēnā i a koe nā.

Hei Mahi Whakarongo

Kua tīpakohia tētehi wāhanga o te hōtaka o Whakataukī hei whakapakari i ngā pūkenga whakarongo i te rā nei. Ko Paraone Gloyne te kaiwhāngai i ō tātou taringa ki te kupu. Anei ngā pātai hei whakautu mā koutou:

- 1) E rua ngā kōrero āhua ōrite nei. He aha aua kōrero e rua?
- 2) He aha te ngako o ngā kōrero rā?
- 3) He kupu whakarite te kākaho mō te aha?

Tēnā tahuri mai ki te whakarongo ki ngā whakamahuki a tēnei kaitutungi i te reo, a Paraone Gloyne.

He Whakamārama

I te nuinga o ngā rerenga whakataurite, ka noho te pū 'i' i waenga i ngā mea e rua e whakatauritehia ana. Kotahi anahe te tauira ka rerekē, arā, ko te kupu 'rite'. I ngā rerenga whakataurite e mau ana i te kupu 'rite', ka noho te pū 'ki' i waenga i ngā mea e rua e whakatauritehia ana. Tirohia ēnei tauira:

1. Me whai koti au, **pērā i** tērā.
2. He **rerekē** tēnei i tēnā.
3. He nui **ake** tēnei i tēnā.
4. **pēnei/whēnei/pēneki...i**
5. **pēnā/whēnā/pēnaka...i**
6. **pērā/whērā/pēraka...i**
7. He **rite** tēnei **ki** tēnā.

He Mahi Ī-papa



Tuhia he rerenga kōrero e kitea ai te kupu i runga i te ĩpapa me te pū 'i' hei whakataurite.

Hei Mahi

Whakamāorihia ēnei rerenga kōrero:

1. I wanted a dress that was different to Mary's.
2. Do you have a car like this one?
3. This tree is taller than that one over there.
4. Our pants are the same as his.

Whakautu:

Mahi ĩpapa: He iti iho ēnei āporo i ērā rā.

Hei Mahi:

1. I hiahia au ki tētehi kaka e rerekē ana i tō Mere.
2. He motokā tōu pēnei i tēnei?
3. He teitei ake tēnei rākau i tērā rā.
4. He rite tonu ō tāua tarau ki tōna.